

23 OCT 2003

Jelajah-Pasangan (Bergambar)

JELAJAH KILAUAN PERDANA MENTERI TIBA DI ALOR STAR

ALOR STAR, 23 Okt (Bernama) -- Sepasang suami isteri dari Negeri Sembilan yang sedang dalam misi penjelajahan ke seluruh negara sempena menghargai kepimpinan Perdana Menteri Datuk Seri Dr Mahathir Mohamad selama 22 tahun, tiba di sini hari ini.

Baharin Abdullah, 44, dan isteri Fauziah Tajularus, 43, yang memulakan penjelajahan mereka dari Kuala Pilah pada Ahad lepas setakat ini telah singgah di Pahang, Terengganu, Kelantan dan Perak.

Kereta mereka juga kini telah dipenuhi beratus tandatangan daripada pemimpin atau orang ramai di tempat yang mereka singgahi.

Penjelajahan dengan menaiki kereta itu dijangka akan berakhir di Putrajaya pada 31 Okt. Acara pelepasan penjelajahan mereka yang dinamakan "Jelajah Kilauan Perdana Menteri Suami-Isteri" disempurnakan oleh Anggota Dewan Undangan Negeri Seneling Datuk Ismail Lasim.

Semasa singgah di sini hari ini, Menteri Besar Kedah Datuk Seri Syed Razak Syed Zain turut menurunkan tandatangannya di kereta mereka.

Apa yang menarik, penjelajahan pasangan suami isteri itu juga dilakukan bersempena ulangtahun ke-22 perkahwinan mereka.

Baharin yang juga seorang peniaga ketika ditemui berkata semasa tiba di Putrajaya nanti, Dr Mahathir dijangka akan menurunkan tandatangannya pada kenderaan mereka.

Beliau berkata, penjelajah itu diadakan dengan modal sendiri tanpa ditaja oleh mana-mana pihak yang dijangka melibatkan kos sebanyak RM10,000.

"Saya bersama isteri melakukan ini semata-mata untuk membuktikan sokongan padu kepada kepimpinan Perdana Menteri yang sebelum ini saya sendiri pernah menentangny," katanya.

Baharin pernah bertanding dalam pilihan raya umum 1990 bagi kerusi Dewan Undangan Negeri Juaseh atas tiket parti Semangat 46 tetapi tewas kepada wakil Barisan Nasional. Beliau kemudiannya menyertai Umno pada 1991.

"Jadi penjelajahan ini juga diandaikan sebagai perjalanan untuk memohon maaf dan meminta restu daripada semua kepimpinan parti dan masyarakat," katanya.

-- BERNAMA

MNH MAN RHM